



Նար-Դոս

Ջագունյան

7

34

Հետևյալ օրը, երբ նա աչքերը բաց արեց, տեսավ Ջաքարին սեղանի մոտ նստած:

Ջաքա՞ր... ի՞նչ կա, ի՞նչ է պատահել, կանչեց նա սաստիկ վախեցած, տեղից իսկույն վեր թռչելով:

Ի՞նչ պետք է պատահի, ի՞նչպես ես վեր թռչում, զարմացավ Ջաքարը, վեր կենալով և մոտենալով նրան: Ե՛ւ պետք է քեզ հարցնեմ, թե ինչ է պատահել, որ այդպես առանց հանվելու ես քնել: Երևի արթած ես եղել:

Ջագունյանը ազատ շունչ քաշեց. կարծես մի ծանր, անտանելի ծանր բեռ ընկավ նրա սրտից: Նա նայեց իրեն, և տեսավ, որ, իրավ, առանց հանվելու է քնել:
Գիշերվա անցքը նորից սկսեց մտատանջել նրան, թե արդյոք այն իսկապես երազ էր, թե իրողություն:

Համարյա, պատասխանեց նա ոչ իսկույն: Բայց այս ի՞նչ է. այս ժամանակ դու իմ սենյակո՞ւմ:

Իհարկե կգարմանաս, քանի որ մոռացել ես, թե մեզ ի՞նչ ես ասել և ինչ ես խոստացել, ասաց Ջաքարը: Անցյալ օրը մեզ ասում ես, թե մեկ կամ երկու օրից

պետք է հեռանաւ և խոստանում ես հեռանալուց առաջ այցելել մեզ, այնինչ երեկ բոլորովին ոտք չես դնում մեր տուն: Երեկ երեք անգամ եկա այստեղ, բայց ոչ մի անգամ էլ քեզ այստեղ չգտա: Այսօր էլ վախենալով, թե միգուցե մեզ մոռացած լինես և առանց մեզ տեսնելու հեռանաւ (դու այնպիսի մարդ ես, որ զարմանալի էլ չէ, եթե այդպիսի բան անես), ահա այսպես վազ-վազ գալիս եմ քեզ մոտ: Ասենք, էլ ինչ վաղ է, քանի ժամանակ է նստած եմ այստեղ:

Ի՞նչ ես ասում, զարմացավ Ջագունյանը:

Այո՛: Խո անհանգիստ չէի անի քունդ, մանավանդ որ տեսնում էի՝ ուշ ես պառկել քնելու, որովհետև եթե վաղ պառկած լիների, ինչքան էլ արբած լիների, դարձյալ ժամանակ կգտնեիր հանվելու և դուռը փակելու: Բայց այդ չէ, Արսեն . ահա ինձ ինչ է հետաքրքրում: Այս ի՞նչ է:

Նա վերցրեց սեղանի վրայից մի թուղթ և ցույց տվեց Ջագունյանին:

Ջագունյանը նայեց և ցնցվեց . կնոջ նամակն էր, որ թողել էր սեղանի վրա և որի գոյությունը բոլորովին մոռացել էր:

Ի՞նչ է, հարցրեց նա իր կողմից, ինքն էլ չիմանալով, թե ինչ է ասում:

Այս նամակը: Ներիր, որ հետաքրքրությունս չկարողացա զսպել և կարդացի: Ո՞ւմն է գրած:

Ինձ:

Ո՞վ է գրել:

Կինս:

Դու կի՞ն ունես:

Ունեի:

Չաքարը զարմանքից ապուշ կտրած՝ նայեց Ջագունյանի աչքերին:

Հետո, այստեղ մի անուն կա, ասաց նա, նայելով նամակին: Անուշ... ո՞վ է:

Աղջիկս:

Ուրեմն դու համ կին ես ունեցել, համ աղջիկ:

Այո:

Զաքարը նամակը դրեց սեղանի վրա և ձեռքերը զարկեց իրար:

Ահա թե ում համար է ասված՝ մարդը գիշերից էլ մութ է, ասաց նա: Երբեք մտքովս էլ չեմ անցկացրել, թե դու կարող ես ամուսնացած լինել և գավակ ունենալ: Իսկ դու ինչո՞ւ էիր այդ բանն ինձնից ծածկում: Դու մի ամբողջ ռոման, մի ամբողջ պատմություն ես ունեցել և ինձ ոչ մի խոսք չես ասել: Այդ ներելի՞ է քեզ, մեր բարեկամությանը, մեր եղբայրությանը: Ապա ի՞նչպես չնեղանամ քեզնից, ի՞նչպես չնեղանամ: Է՛հ . . .

Նա ձեռքը թափահարեց և նստեց սեղանի մոտ:

Զագունյանը կանգնած էր անշարժ:

Կարճ ժամանակ լռություն տիրեց:

Ե՞րբ ես ստացել այս նամակը, հանկարծ հարցրեց Զաքարը:

Երեկ գիշեր, պատասխանեց Զագունյանը:

Գիշե՞րը . . . Ո՞ւմից...

Զագորսկուց:

Զագորսկո՞ւց, խիստ զարմացավ Զաքարը:

Այո:

Հետո՞:

Հետո ի՞նչ, ասաց Ջագունյանը, նստելով մահճակալի վրա:

Ջագորսկուց ինչո՞ւ պետք է ստանայիր այս նամակը, ի՞նչ է շինում նրա ձեռքին:

Կինս նրան էր սիրում:

Ջագորսկո՞ւն, բացականչեց Ջաքարը:

Այո:

Ջաքարը բոլորովին ապուշ կտրեց:

Աստված է վկա, Արսեն, ես ոչինչ չեմ հասկանում, ասաց նա վեր կենալով և մոտենալով նրան: Հետո՞, հետո ի՞նչ, անհամբերությամբ հարցրեց նա: Պատմիր, թե աստվածդ կսիրես:

Ի՞նչ պատմեմ, արդեն պարզ է, ասաց Ջագունյանը: Կինս սիրում էր Ջագորսկուն. թողեց ինձ և փոքրիկ աղջկան և հեռացավ նրա հետ: Մի տարուց հետո աղջիկս մեռավ, իսկ ես անձնատուր եղա ճանապարհորդության, վիշտս մոռանալու համար: Այսքան ժամանակ ոչ մի տեղեկություն չունեի կնոջս մասին և չէի էլ ուզում ունենալ, բայց երեկ գիշեր ճաշարանում Ջագորսկին պատահմամբ հանդիպեց ինձ և տվեց այդ նամակը: Այս է բոլորը:

Ջաքարը բերանը բաց նայում էր նրան: Նրա դեմքի վրա այս անգամ երևում էր սաստիկ կարեկցություն:

Ի՛նչ թշվառ մարդ ես, վերջապես ասաց նա հառաչելով և նամակը նորից վերցնելով սկսեց մտքումը կարդալ: Ի՛նչ թշվառ է և այս կինը, ասաց նա, նամակը կարդալուց հետո, աչքերը չհեռացնելով նրանից: Ուրեմն այդպես, հը՞, կարճ լռությունից հետո ասաց նա: Հիմա եմ հասկանում, թե ինչո՞ւ դու այնպես խույս էիր տալիս Ջագորսկուց. դու մի՛ ասի ձեր մեջ մի այդպիսի բան է եղել... Բայց Ջագորսկին, Ջագորսկին... ի՞նչ կկարծեի, թե նա այդ աստիճան ստոր կերպով կվարվի քեզ հետ... Իսկ քո կինն էլ, բարեկամ, ինչպես երևում է, ներիր ինձ, լավ պտուղ չի եղել: Ես Ջագորսկուն այնքան չեմ մեղադրում, որքան նրան: Եթե նա լավ...

Ի սեր աստծո, Չաքար, թողնենք այս խոսակցությունը և մոռանանք ամեն բան, ասաց Չագունյանը, վեր կենալով տեղից: Նրա համար չափից դուրս անտանելի էր խոսել այդ մասին, մանավանդ Չաքարի հետ, որին բախտը, թեև իրենից այժմս ծածուկ, վիճակել էր նույն դերը կատարելու, ինչ դեր որ կատարում էր այդ բանում ինքը Չագունյանը:

Բայց մի բան, ասաց Չաքարը: Այս ե՞րբ է պատահել:

Ի՞նչը, մահը... Անցյալ տարի...

Անցյալ տարի... Չէ, ես այդ չեմ ա...

Ասացի թողնենք այս, թողնենք:

Կարճ ժամանակ լռություն տիրեց:

Բայց դու ներո՞ւմ ես նրան, հանկարծ հարցրեց Չաքարը:

Ներում եմ:

Անկե՞ղծ սրտով:

Բոլորովին անկեղծ սրտով:

Չաքարը դարձյալ կարեկցությամբ նայեց նրան:

Խեղճ Արսեն, ասաց նա:

Չագունյանը հոնքերը կիսեց:

Ինձ մի՛ խղճա, խուլ ձայնով ասաց նա և հանեց սյուրտուկը, որպեսզի լվացվի: Ժամը քանի՞սն է:

Չաքարը հանեց ժամացույցը և նայեց:

Պահ, շուտով տասնմեկը կլինի, կանչեց նա անհանգստությամբ: Ես պետք է գնամ ախր հիվանդանոց. քնելդ ինձ էժան չնստեց: Շտապեմ: Բայց, լսիր: Արսեն, ինչ եմ ասում: Ի սեր աստծո, գնա մեր տուն, ճաշին մեզ մոտ կլինես: Այսօր, ինչպես տեսնում եմ, դու բոլորովին միտք էլ չունես մեկնելու: Չէ՞:

Այսօր. չէ, այսօր չեմ կարող, պատասխանեց Ջագունյանը:

Ուրեմն ինչ ուզում է լինի, էլի մի քանի օր կմնաս այստեղ:

Չգիտեմ... գուցե...

Հա, հա, մնա, թե աստվածդ կսիրես, մնա, ասաց Ջաքարը գլխարկը ծածկելով: Իսկ այսօր, հենց հիմա, հագնվելուց հետո, գնա մեր տուն: Ժամը մեկին կամ երկուսին էլ ես կվերադառնամ: Առայժմ ցտեսություն: Անպատճառ գնա:

Եվ նա շտապով դուրս գնաց:

Ջագունյանը տխուր հայացքով նայեց նրա ետևից:

Թշվառական, ի՞նչ ես ինձ այդպես ստիպում, ասաց նա: Եթե գիտենաս, թե ով եմ ես... Բայց չէ՛, չէ՛, քո անկեղծ հավատը կփրկե քեզ...

Լվացվելուց հետո նա հագուստը փոխեց, որովհետև անկողնում բավական ճնովել էր: Հագնվելուց հետո նա դեռ չէր վճռել՝ գնա՞ Էմմայի մոտ, թե ոչ: Բայց որովհետև գիշերվա հանելուկը նրան քանի գնում, ավելի էր մտատանջում, այդ պատճառով նա այլևս երկար չսպասեց և վճռեց գնալ: Հանելուկն ուզում էր շուտով լուծել:

Նա ծածկեց ցիլինդրը և դուրս գնաց:

35

Նա նոր էր մտել հյուրասենյակը, երբ հանկարծ երեխայի նման ներս վազեց Էմման և ուղղակի փարվեց նրա վզովը, կանչելով՝

Արսեն... դու չե՞ս փախել, դու չե՞ս փախել:

Եվ նախքան Ջագունյանը ուշքի կգար, նա ամուր համբուրեց նրա ականջի մոտ և բաց թողեց նրան:

Է՛մմա, Է՛մմա, շնչաց Ջագունյանը սարսափած: Դու մոռանում ես, որ ես ձեր հյուրն եմ, որ ես իմ բարեկամիս տանն եմ գտնվում...

Իմ ի՞նչ գործն է, մի տեսակ չարաճճի, միամիտ ժպիտով ասաց Էմման: Կարծես թե այդ ինձ համար որևէ նշանակություն ունի... Ես քեզ եմ սիրում, դու ինձ ես սիրում, պրծավ գնաց... մի՞թե դրանից դուրս աշխարհիս երեսին ուրիշ բան գոյություն ունի մեզ համար: Երեկ գիշեր ինձ դրախտից դուրս արիր, ուղարկեցիր այս դժոխքը, հիմա դրախտն այստեղ ես բերել և դարձյալ ինչ՞որ հիմար բաներ ես հիշեցնում:

Ջագունյանը բոլորովին սարսափած նայում էր նրան:

Ուրեմն այդ ճշմարիտ է, շնչաց նա:

Ի՞նչը:

Որ երեկ գիշեր դու ինձ մոտ էիր:

Ախ: քեզ է՞լ այդ երազ է թվում, կանչեց Էմման ուրախ կշկշալով: Երևակայիր, ես էլ ոչ մի կերպ չեմ ուզում հավատալ, թե երեկ գիշեր քեզ մոտ էի, այնինչ, ախր, իսկապես քեզ մոտ էի: Ի՞նչ էիր անում դու, երբ ես մտա քեզ մոտ... Ես ոչինչ, ոչինչ չեմ հիշում, միայն այն եմ հիշում, որ դու... վռնդեցիր ինձ:

Նա երեխայի նման խնդաց:

Ջագունյանի լեզուն կարծես կապվել էր, նա միայն անթարթ նայում էր Էմմայի գեղեցիկ, չարաճճի դեմքին:

Ի՞նչ ես ինձ այդպես նայում, կանչեց Էմման, ավելի խնդալով: Վա՛, մի՛ նայիր ինձ այդպես, ծիծաղս գալիս է...

Բայց այն կեսգիշերին ինչո՞ւ եկար, Էմմա, հարցրեց Ջագունյանը, որ ինքն էլ չէր իմանում, թե ինչ էր ասում:

Ինչո՞ւ եկա, դժգոհությամբ կանչեց Էմման: Ի՞նչ է նշանակում՝ ինչո՞ւ եկա:

Այսինքն՝ ուզում եմ ասել՝ ինչպե՞ս եկար, ինչպե՞ս չվախեցար:

Ախ, այդ էլ հարցնելու բան չէ: Ի՞նչ է նշանակում՝ ի՞նչպես եկար, ի՞նչպես չվախեցար: Մի՞թե դու ինձ այն դրության մեջ էիր ձգել, որ ես որևէ բանից վախենայի: Եթե մինչև անգամ գիտենայի, որ ճանապարհին միլիոնավոր գազաններ կպատահեն, դարձյալ կգայի: Երևակայիր, անցյալ օրը հանկարծ, անսպասելի կերպով հայտնում ես, թե մի կամ երկու օրից հետո, այսինքն՝ երեկ կամ այսօր անպատճառ պետք է հեռանաս այստեղից, ես խնդրում եմ, որ հեռանալուց առաջ այցելես մեզ, իսկ դու... Երեկ ամբողջ օրը սպասում էի, սպասում ո՞ր է... Այլևս համբերություն կմնա՞ր, ինքդ ասա, այլևս կարո՞ղ էի համբերել: Չեմ կարող ասել, թե ինչպես տանջվում էի ես, որ մտածում էի, թե դու կարող ես, առանց ինձ տեսնելու, հեռանալ այստեղից կամ արդեն հեռացած կլինես: Ես պարզապես խելագարված էի: Կեսգիշերին ի՞նչպես եկա քեզ մոտ ինքս էլ չգիտեմ, միայն երբ սենյակիդ դուռը բաց գտա և ներս մտնելով քեզ տեսա այնտեղ... Ա՛խ, եթե իսկույն մեռնեի էլ, միևնույնը կլինեիր ինձ համար... Բայց ո՞րքան անխիղճ վարվեցիր դու ինձ հետ, Արսեն, հենց նոր մտել էի, իսկ դու իսկույն վռնդեցիր ինձ:

Բայց ի՞նչպես հասար տուն, հարցրեց Ջագունյանը:

Ի՞նչպես հասա... Թռա, ա՛յ, այնպես, ինչպես թռչում են ծտերը թը՛ռռ...
Հավատա, ես թևեր ունեի... ինչպե՞ս թեթև թռչում էի: Հիմա էլ կարող եմ թռչել, գիտե՞ս: Կուգես, թռչեմ:

Իրավ, նա թռավ և փարվեց Ջագունյանի վզովը:

Է՛մմա, Է՛մմա, դարձյալ սարսափած շնչաց Ջագունյանը և ազատվեց նրա գրկից: Ի՞նչ ես անում:

Թռչում եմ, կանչեց Էմման կշկշալով:

Բայց այդ թռիչքները շատ վտանգավոր են:

Ի՞նչ անեն... ես թևեր ունեմ և թռչում եմ . . .

Է՛մմա...

Ախ, անունս այդպես մի արտասանիր, չեմ սիրում... այ, այնպես խոսիր ինձ հետ, ինչպես ես եմ քեզ հետ խոսում:

Այստեղ մարդ կարող է մտնել, Էմմա, քիչ հանգիստ:

Ո՞վ կմտնի, ո՞վ կարող է մտնել... Թող թեկուզ հենց մտնեն, ի՞նչ է որ:

Չագունյանը բոլորովին շփոթվել էր, նա չգիտեր ինչպես հանգստացնել Էմմային, որը մի կատարյալ չարաճճի երեխա էր դարձել:

Թե սիրում ես ինձ, Էմմա, հանգիստ, կամաց արտասանեց նա: Քո տեղ ես եմ վախենում:

Վախենո՞ւմ... Տե՛ր աստված, սա միշտ տարօրինակ բաներ է ասում... Ի՞նչ է նշանակում՝ վախենում... մի՞թե մենք որևէ բանից կարող ենք վախենալ, երբ միմյանց մոտ ենք: Ո՞ւմից կամ ի՞նչից պետք է վախենանք:

Մեր խղճից: Էմմա, մեր խղ...

Էմման ձեռքով իսկույն փակեց նրա բերանը:

Մի՛, մի՛, կանչեց նա շնչասպառ, այդ խոսքը չեմ ուզում . . . Չագունյանը տեսավ, թե ինչպես նրա գվարթ, պայծառ, կենդանությանը շնչող դեմքը մի ակնթարթում գունատվեց:

Ուրեմն տեսնո՞ւ...

Էմման ավելի պինդ սեղմեց ձեռքը նրա բերանին:

Լռի՛ր, շնչաց նա: Ի՞նչ եմ անում դժոխքը, երբ դրախտի մեջ եմ... Լռի՛ր: Նա
ձեռքը հեռացրեց Ջագունյանի բերանից և, դնելով իր շրթունքներին, շնչաց. սո՛ւ,
սո՛ւ... Ի՞նչպես անցրիր գիշերը, հանկարծ հարցրեց նա առաջվա ուրախ և
զվարթ ձայնով:

Ջագունյանը շատ տխուր նայեց նրան և նստեց:

Շատ վատ, ասաց նա ոչ իսկույն:

Ախ, ինչո՞ւ այսօր շարունակ այդպիսի վատ բաներ եմ ասում, խիստ
դժգոհությամբ կանչեց Էմման: Բայց ապա մեկ ասա տեսնեմ, թե ինչու գիշերը
վատ պետք է անցկացնեիր. հանկարծ ասաց նա, նստելով նրա կողքին, մոտիկ
մի ուրիշի աթոռի վրա:

Ջագունյանը դարձյալ նայեց նրան:

Իսկ դու ի՞նչպես անցկացրիր, պատասխանելու տեղ հարցրեց նա:

Չէ, դեռ դու ինձ պատասխանիր, թե ինչո՞ւ գիշերը վատ պետք է անցկացնեիր:

Որովհետև այն կեսգիշերին քեզ մենակ ճանապարհ դրի և չգիտեի, անվտա՞նգ
տուն հասար, թե ոչ:

Հա՛, հա՛, հա՛, բարձրաձայն սկսեց ծիծաղել Էմման: Ինչո՞ւ ինձ մենակ
ճանապարհ դրիր:

Խելքս գլխի՞ս էր: Հետո, երբ հանկարծ հիշեցի, թե ի՛նչ աններելի սխալ եմ
գործել, իսկույն խենթի նման դուրս վազեցի և եկա մինչև այստեղ, ձեր տուն:
Բայց էլ ինչ կօզներ. ոչ իմացա, թե դու անվտանգ տուն ես հասել, ոչ էլ իմացա,
թե ճանապարհին քեզ որևէ վտանգ է պատահել, և այնպես էլ վերադարձա:
Ամբողջ գիշերն աչքս չեմ խփել: Առավոտյան հագիվհագ քունս եկել էր և հենց
այնպես առանց հանվելու էլ քնել եմ:

Հետո՞, հարցրեց Էմման, որ, հագիվ գսպելով ծիծաղը, շարունակ նայում էր
նրան:

Հետո ի՞նչ: Մեկ էլ աչքերս բաց եմ անում՝ տեսնեմ Ջաքարը նստած է սենյակումս: Սկզբում խիստ վախեցա. կարծեցի, թե գիշերն անպատճառ քեզ մի բան է պատահել ճանապարհին, որ եկել է ինձ մոտ, բայց որ իմացա, թե նա միայն ինձ հրավիրելու է եկել, ազատ շունչ քաշեցի:

Հա՛, հա՛, հա՛, ազատություն տվեց Էմման իր ծիծաղին: Բայց ո՞րտեղ է երագը. էլ ո՞րտեղից էր իմ այցելությունը քեզ երագ թվում:

Իհարկե, երագ էր ու երագ, քանի որ ոչ մի ակներև փաստ չկար, որ հաստատեր, թե դու գիշերն իսկապես այցելել ես ինձ: Ահա հիմա միայն իմացա, որ այդ երագ չի եղել:

Հա՛, հա՛, հա՛, դարձյալ ծիծաղեց Էմման: Բայց եթե իսկապես երագ լիներ միայն, այն ժամանակ ի՞նչ կանեիր, հանկարծ հարցրեց նա և հետաքրքրությամբ նայեց Ջագունյանի դեմքին:

Ի՞նչ պետք է անեի, չիմանալով ինչ պատասխաներ, ասաց Ջագունյանը: Կհեռանայի, հանկարծ դուրս թռավ նրա բերանից:

Առանց ինձ տեսնելու՞, շտապով հարցրեց Էմման, ավելի հետաքրքրությամբ նայելով նրա դեմքին:

Ոչ, քեզ պետք է տեսնեի:

Ինչո՞ւ, կրկնապատիկ հետաքրքրությամբ հարցրեց Էմման:

Ջագունյանն ուզում էր հայտնել իր նախօրեն կազմած ծրագիրը, որի համեմատ նա վերջին անգամ պետք է տեսներ Էմմային, բացատրեր նրան իրենց դրությունը, բայց... չկարողացավ:

Հրաժեշտ տալու, պատասխանեց նա միայն:

Ի՞նչ, զարմացած երկարացրեց Էմման, գլուխն առաջ և անելով դեպի նրա դեմքը: Հրաժեշտ տալու՞...

Չագունյանը շփոթվեց նրա համառ հայացքից:

Այո, պատասխանեց նա, որպեսզի մի պատասխան տված լինի:

Եվ միայն:

Այո, կրկնեց Չագունյանը բոլորովին շփոթվելով:

Էմման գունատվեց:

Ուրեմն ինձ չե՞ս սիրում, կամաց պատասխանեց նա:

Էմմա, զարմացավ Չագունյանը:

Ուրեմն հիմա էլ չես սիրում, քանի որ այսօր պետք է հեռանայիր, այսօր պետք է հրաժեշտ տայիր ինձ, շարունակեց Էմման, ավելի ու ավելի գունատվելով:

Սուտ եմ ասում, Էմմա, սուտ եմ ասում, ասաց Չագունյանը, նոր հասկանալով, թե ինչպիսի անմիտ պատասխաններ էր տվել նրան: Ներիր ինձ, աղաչում եմ... Ես բոլորովին չմտածեցի, թե ինչ եմ ասում: Կարո՞ղ էի միթե տեսնել քեզ վերջին անգամ և այն էլ հրաժեշտ տալու համար միայն: Կարո՞ղ էի միթե այսպես շուտ հեռանալ քեզնից, քեզնից, որ ինձ համար ամեն ինչ ես: Ո՞ր կարող եմ գնալ ես այստեղից... կարո՞ղ եմ քեզնից հեռանալ... կարո՞ղ եմ ուրիշ տեղ ապրել առանց քեզ... Ախ, Է՛մմա, Է՛մմա, ինչո՞ւ ես ինձ այսպես տանջում, վերջապես բացականչեց նա համարյա արտասովորաբար ձայնով:

Էմման հանկարծ ամուր փաթաթվեց նրա վզովը և շրթունքները սեղմեց նրա շրթունքներին...

36

Ժամը երկուսին, երբ Չաքարը տուն եկավ, Չագունյանն արդեն գնացել էր: Կինն իր սենյակումն էր: Չաքարը գնաց նրա մոտ: Երբ նա՝ իր սովորության համեմատ՝ արագ քայլերով մտավ կնոջ սենյակը, կինը նստած էր փոքրիկ թախտի վրա և երկու ձեռքով ամուր գրկած ասեղնագործ բարձր՝ մի տեսակ երջանիկ

ինքնամոռացության մեջ այտը սեղմել էր նրա վրա: Ամուսնու մտնելուն պես՝ նա սթափվեց և, առանց շտապելու բարձր դնելով իր տեղը, զարմացած, մինչև անգամ խստությամբ կամաց նայեց նրան:

Ի՞նչ ես անում, Է՛մմա, փոքր-ինչ զարմացած հարցրեց Ջաքարը:

Ի՞նչ է, սառնությամբ հարցրեց Էմման:

Ինչո՞ւ էիր բարձր գրկել . երեխա՞ էիր կարծում, ի՞նչ է:

Էմման վեր կացավ և գնաց դեպի լուսամուտը:

Ատամս ցավում է, հնարեց նա:

Այդ էր պակաս, ասաց Ջաքարը: Առավոտյան չէր ցավում:

Ի՛նչպես չէր ցավում . . . առավոտյան էլ էր ցավում, երեկ էլ, բայց այսքան չէ, որքան հիմա:

Հապա ինչո՞ւ չէիր ասում:

Դու ի՞նչ պետք է օգնեիր:

Այնուամենայնիվ . . . դեղ դրե՞լ ես:

Դեղը չի օգնում:

Էմմայի համար անտանելի էր երկար սուտ խոսել, այդ պատճառով խոսակցությունը փոխելով՝ ասաց .

Մոռացա ասեմ, որ Արամիկի համար կոշիկ պետք է գնվի:

Այդ կգնենք, ասաց Ջաքարը: Բայց դու ինձ այս ասա, Ջագունյանը չի՞ եկել:

Եկավ, պատասխանեց Էմման:

Հետո, ո՞ւր է:

Գնաց:

Ո՞ր գնաց:

Ասում է՝ գործ ունեմ:

Բայց ճաշին չի՞ գալ:

Ասաց, որ չէ:

Է-Է՛հ, ինչ անշնորհքն ես, Էմմա, թեթև դմգոհությամբ ասաց Չաքարը: Ինչո՞ւ թողիր, որ գնա:

Չարմանալի է, խո չէի կարող թոկերով կապել, պատասխանեց Էմման, որին այդ խոսակցությունն ավելի անտանելի էր, քան սուտ խոսելը:

Գոնե չասացի՞ր, որ երեկոյան կամ վաղը գա, հարցրեց Չաքարը:

Էմման հանկարծ օտարոտի համարձակ հայացքով նայեց ուղղակի նրա աչքերին:

Ասացի, որ վաղը դարձյալ գա, պատասխանեց նա, նույնպես օտարոտի ձայնով:

Եվ խոստացա՞վ:

Այո, խոստացավ:

Այդ օրից, հենց այդ րոպեից Էմման զգում էր, որ Չաքարի հետ ունեցած իր հարաբերությունն ականա թշնամական արտահայտություն է ստանում: Մի անհասկանալի, բայց ուժեղ զգացմունք հետզհետե բաժանում էր նրան Չաքարից: Չաքարին նա այլևս իր սրտակիցը, իր հարազատը չէր զգում, այլ մի տեսակ օտար, մինչև անգամ ծանր բեռ, որ քանի գնում, այնքան ավելի ծանրանում էր, այնքան ճնշում էր նրան իր ծանրության տակ: Այն տեղը, որ Չաքարը բռնում էր նրա սրտի մեջ, դատարկվեց, և նրա սիրտը, կարծես ընդմիջտ, ամուր փակվեց ամուսնու համար: Նրան ամենից ավելի անտանելի էին թվում Չաքարի երկար ու բարակ հարցուփորձերը: Դրա համար,

ատամնացավը պատճառ բերելով, ուզում էր ճաշին դուրս չգալ իր սենյակից և բոլորովին չճաշել, բայց մեկ էլ մտածելով, որ այդ արդեն չափից դուրս կլինի, գլխավորը Ջաքարն ավելի ևս հանգիստ չի տա իրեն, այդ պատճառով դուրս գնաց և նստեց ճաշի: Ծաշը վերջանալուց հետո նա գնաց և նորից փակվեց իր սենյակում: Նա ուզում էր անձնատուր լինել իր քաղցր ցնորքներին:

Ջաքարը նրա օտարոտի դրությունը վերագրում էր ատամնացավին: Ծաշից հետո նա նույնպես փակվեց իր սենյակում և պառկեց, որպեսզի իր սովորության համաձայն՝ մի կուշտ քնի: Բայց այս անգամ քունը չէր գալիս, նա մտածում էր Ջազունյանին վերաբերող այն գաղտնիքի մասին, որ այդ օրն առավոտյան նամակի շնորհիվ իմացավ իրեն Ջազունյանից: Այդ բանը շատ էր ազդել նրան, այդ պատճառով նրա միտքը շարունակ գբաղված էր դրանով: Նա գիտեր, որ Ջազունյանն այդ մասին ոչինչ ասած չէր լինիլ Էմմային, այդ պատճառով մեկ ուզում էր ինքը հայտնել, մեկ էլ չէր ուզում: Բայց վերջապես չկարողացավ դիմանալ և վճռեց հայտնել: Նա վեր կացավ և գնաց կնոջ սենյակը:

Էմման այս անգամ երեսն ի վեր պառկած էր թախտի վրա և մատները իրար մեջ հյուսած՝ ձեռքերը դրել էր գլխի տակ: Ինչպես երևում էր, քաղցր ցնորքները նրան շատ հեռու էին տարել, որովհետև չիմացավ, թե ինչպես մտավ Ջաքարը: Բայց հանկարծ տեսնելով նրան, վեր կացավ և նստեց:

Ախր այսօր մի անսպասելի գաղտնիք իմացա, Էմմա, ասաց նա խորհրդավոր ձայնով, նստելով նրա կողքին:

Էմման զարմացած և հետաքրքրությամբ, լուռ նայեց նրա դեմքին:

Դու մի՛ ասի, Ջազունյանը կին և զավակ է ունեցել, ասաց Ջաքարը:

Ի՞նչ, դուրս թռավ Էմմայի բերանից, և նա իսկույն գունատվեց ինչպես մեռել:

Այո, կին և զավակ է ունեցել, կրկնեց Ջաքարը, կնոջ այդ բացականչությունն ու փոփոխությունը գաղտնիքի անսպասելիությանը վերագրելով: Ահա թե ինչպես էր:

Եվ նա մի առ մի պատմեց, թե ինչպես այդ օրն առավոտյան Ջագունյանի սենյակում սեղանի վրա գտավ հայտնի նամակը, պատմեց նրա բովանդակությունը և այն, ինչ որ լսել էր Ջագունյանից:

Էմման լսում էր նրան ըստ երևույթին բոլորովին հանգիստ, մինչև անգամ սառնասրտությամբ: Նրա գունատ, կարծես մեռած դեմքից բոլորովին ոչինչ չէր կարելի իմանալ, թե ինչ է կատարվում նրա մեջ: Հոնքերը ցած թողած և քթածակերը լայնացրած՝ նա միայն շարունակ նայում էր հատակի մի կետի:

Տեսնո՞ւմ ես, Ջագորսկու և Ջագունյանի մեջ ինչ բան է եղել, որի մասին մենք այնքան գլուխ էինք կոտրում և ոչինչ չէինք կարողանում իմանալ, վերջացնելով պատմությունը, ասաց Ջաքարը: Ես բոլորովին չէի կարծի, թե Ջագունյանը մի այդպիսի գաղտնիք կարող է ունենալ: Խեղճն էլ ինչպես ծածուկ էր պահում մեզնից: Խեղճ Արսեն... շատ, շատ կոտրված է սիրտը: Ուզում է բոլորովին մոռացության տալ, ինչ որ պատահել է, բայց ի՞նչպես կարելի է. այդ այնպիսի բան է՞, որ կարելի լինի մոռանալ: Ես շատ խղճում եմ նրան, շատ անբախտ մարդ է: Դու մի ասիլ գլուխը ճանապարհորդության է տվել վիշտը մոռանալու համար:

Էմման ձայն-ծպտուն չհանեց: Նստած էր նույն դրության մեջ, ինչպես առաջ:

Ջաքարը նայեց նրան և այս անգամ կնոջ դրությանը բավական օտարոտի թվաց նրան:

Ինչո՞ւ ես այդպես, Էմմա, հարցրեց նա վախեցած:

Ի՞նչպես եմ, հանգիստ ձայնով ասաց Էմման, հայացքը կամաց դեպի նա դարձնելով:

Դու, սաստիկ գունատ ես:

Էմման կամաց թիկն տվեց մութաբային:

Ատամս շատ է նեղացնում, ասաց նա նույն հանգիստ ձայնով:

Դեղ դիր, սիրելիս, այդպես չի կարելի, զգացված ասաց Չաքարը: Գոնե ցավը փոքր-ինչ կմեղմանա, եթե չի դադարի:

Լավ, լավ, կոնեն, ասաց Էմման և փակեց աչքերը, ցույց տալու համար, որ իրեն հանգիստ թողնի:

Ես իսկույն կբերեմ...

Չէ, հարկավոր չէ, ես էլ ունիմ այստեղ. . . միայն խնդրում եմ, ինձ հիմա հանգիստ թող:

Հանգիստ թողնելով, հանգիստ կթողնեմ, միայն խնդրում եմ դեղն անպատճառ դիր, թե չէ՝ ցավն, ինչպես տեսնում եմ, չատ է ազդում քեզ: Լսո՞ւմ ես, Էմմա, անպատճառ դիր . ցավն իսկույն կմեղմանա:

Եվ Չաքարը դուրս գնաց կնոջ սենյակից:

37

Չագունյանը ոչ թե գործ ուներ և չսպասեց Չաքարի գալուն, այլ հեռացավ այն պատճառով, որ նրա համար այդ օրվանից չափից դուրս անտանելի էր տեսնել Չաքարին, խոսել նրա հետ, վայելել նրա ընկերական հյուրասիրությունը: Ամեն անգամ, մանավանդ այդ օրը Էմմայից հեռանալուց հետո, Չաքարի մասին մտածելիս մի բան սաստիկ կրծում էր նրա սիրտը: «Մի՞թե այս է խիղճը», մտածում էր նա: «Եթե այս է, ապա անտանելի է... Ա՛խ, ինչպես կուզեի Չագորսկի լինել այս տանջանքը չզգալու համար... երջանիկ մարդ...»:

Չագորսկի լինելու միտքն ակամա հղանում էր նրա գլխում, և նա հանկարծ ցնցվում էր: «Մի՞թե», հարցնում էր նա ինքն իրեն: Նա ամբողջ ժամերով ակամա խորասուզվում էր այդ մտքի մեջ, տեսնում էր, որ Չագորսկի լինելու ցանկությունը իր ներկա դրության մեջ հետևողական է, բայց իսկույն էլ ամբողջ հոգով վրդովվում էր, որովհետև այդ ցանկությունը հակասում էր նրա բարոյական հասկացողություններին: Իր դրության մասին նրա գլխում ծնվող թեր և դեմ մտածումները մի կատարյալ քառս էին ներկայացնում: Ո՞րն էր այդ քառսից դուրս գալու ուղիղ ճանապարհը: «Խիղճ» հանկարծ կանչում էր նա, գյուտ արած

մարդու նման: «Հիրավի մտածում էր նա եթե մարդս իր արարքների վերաբերմամբ պետք է միայն չոր ու ցամաք, թեկուզ հենց շատ խելոք ուղեղով ղեկավարվի, հապա ինչո՞ւ բնությունը նրան խիղճ է տվել, որի ձայնը կասկածելի արարքների վերաբերությամբ միշտ հաղթող է հանդիսանում: Ահա, ես այս րոպեիս գգում եմ այդ. մի՞թե այդ ճշմարիտ չէ: Ճշմարիտ է, և ես կհետևեմ խղճիս: Կամ դեպի անկում, կամ դեպի հաղթանակ. երկուսից մեկը»:

Եվ ինչպես մի խեղդվող մարդ, որ գետի ալիքների մեջ մի փայտի կտոր է գտնում և ամուր կաշում նրանից, որպեսզի չխեղդվի, նույնպես և նա ամուր բռնեց այդ մտքից, մի հաստատ և որոշ ճանապարհ գտնելու համար:

Հետևյալ օրն առավոտյան նա գնաց Էմմայի մոտ այն մտքով, որ այդ օրն անպատճառ խոսի նրա հետ իրենց դրության մասին: Նա դիտմամբ այնպիսի ժամանակ ընտրեց, երբ Չաքարը տանը չպետք է լիներ: Եվ իրավ, Չաքարն արդեն մի ժամ առաջ դուրս էր գնացել տնից, պատվիրելով կնոջը, որ եթե Չագունյանը գա, ճաշին պահի, չթողնի գնալու:

Չագունյանը կարծում էր, որ Էմման այս անգամ էլ կընդունի իրեն նույնպես, ինչպես նախորդ օրը. այդ պատճառով վճռել էր, որ հենց առաջին րոպեից դիմադրի նրա փաղաքշանքներին, բայց՝ հակառակ նրա սպասածին, Էմման այս անգամ դիմավորեց նրան տխուր և գունատ: Նրա դեմքի վրա, շարժումների և քայլվածքի մեջ երևում էր մի տեսակ սառն հանգստություն կամ ավելի ճիշտ է ասել՝ սառն գիտակցական վճռականություն: Վերջին օրերը համարյա յուրաքանչյուր անգամ նա ներկայանում էր Չագունյանին հոգեկան զանազան դրությունների մեջ, կարծես այսօր ուրիշ կին էր, վաղն ուրիշ, մյուս օրը դարձյալ ուրիշ, բայց ամեն անգամ առաջվանից ավելի գեղեցիկ, ավելի սիրելի, ավելի կախարդիչ, այնպես որ Չագունյանը զարմանում և ապշում էր, թե ո՞րտեղից է արտահայտում նա հոգեկան այդքան ուժ և հարստություն, և ինչքան կախարդիչ գաղտնիքներ կան թաքնված նրա սրտի խորքում: Ըստ երևույթին, նա պետք է ուրախանար, որ այս անգամ առանց Էմմայի կողմից փաղաքշական դիմադրության հանդիպելու կարող էր ուղղակի դիմել գործին, որի համար եկել էր. բայց, ընդհակառակն՝ Էմմայի սառն ընդունելությունը հենց առաջին վայրկյանից նրան մեծ երկյուղ պատճառեց. այդ երկյուղը նմանում էր սիրահարի

երկյուղի, որ գգում է, երբ իր սիրելիից սառն ընդունելություն ստանալով,
հանկարծ կասկած է տանում, թե չլինի՝ չի սիրում իրեն: Եվ այդ երկյուղը այնպես
ցնցեց Չագունյանի էությունը, որ նա մինչև անգամ գունատվեց:

Լուռ բարևելով Չագունյանին, Էմման լուռ նստեց գահավորակի վրա:
Չագունյանը նույնպես լուռ նստեց նրա մոտ աթոռի վրա:

Կարճ ժամանակ երկուսն էլ լուռ էին: Այդ լռությունն ավելի ևս կրկնապատկում
էր Չագունյանի երկյուղը: Նա բոլորովին մոռացավ, թե ինչի համար էր եկել և
անհամբերությամբ սպասում էր, թե ինչ պետք է ասի Էմման, կարծես թե այն,
ինչ որ պետք է ասեր Էմման, նրա մահու և կյանքի խնդիրը պետք է լուծեր:

Հոնքերը կիտած և աչքերը վայր թողած՝ Էմման նստած էր անշարժ . նա ոտից
ցզլուխ սառնություն էր արտահայտում: Չագունյանն անթարթ նայում էր նրա
դեմքին և կարծում էր, թե մինչև անգամ չի շնչում:

Ինչո՞ւ ինձնից ծածկում էիք այն, ինչ որ ամենից առաջ ինձ էիք պարտական
հայտնելու, հանգիստ ձայնով և առանց շտապելու ասաց վերջապես Էմման,
շարունակ Նայելով իր ծնկներին:

Չագունյանի երկյուղը գարմանքի փոխվեց:

Ին՞չը, Էմմա, հարցրեց նա:

Այն, ինչ որ Չաքարին երեկ առավոտյան հայտնել էիք:

Չագունյանը ցնցվեց. նա հասկացավ, թե ինչ է ուզում ասել Էմման:

Մի՞թե Չաքարը ձեզ այդ մասին հայտնել է, հարցրեց նա:

Այո, բայց այդ դո՛ւք պետք է հայտնեիք:

Եվ կհայտնեի:

Ոչ, վա՛ղ պետք է հայտնեիք... այն գիշերն ևեթ, երբ ես եկա ձեզ մոտ... հենց
թեկուզ երեկ, երբ դուք ինձ մոտ էիք, որովհետև... դուք հասկանո՞ւմ եք ինձ, ես

ձեզ սիրում եմ և չեմ ուզում, որ դուք ինձ համար մութ և անհասկանալի լինեք, որ ինձնից գաղտնիքներ ունենաք... Այդ ինձ շատ է բարկացնում:

Ներեցեք ինձ, Էմմա, ասաց Ջագունյանն, անհամարձակությամբ առնելով նրա ձեռքերը: Հավատացեք, իմ նպատակս բոլորովին այն չի եղել, որ ձեզնից որևէ գաղտնիք ունենամ, այլ այն, որ այդ անցքն ես ինքս ուզում էի մոռանալ, ջնջել առմիշտ հիշողությունիցս և առավել ևս ուզում էի չհայտնել ձեզ այդ, որովհետև գիտեի... գիտեի որ . . . մի խոսքով՝ չէի ուզում, որ այդ տգեղ անցքը դուք գիտենայիք:

Տգեղ անցքը, դառն մտախոհությամբ ասաց Էմման: Դուք սիրո՞ւմ էիք ձեր կնոջը, հանկարծ հարցրեց նա, գլուխը բարձրացնելով և նայելով նրան:

Ես իմ ողջ կյանքիս մեջ մի անգամ եմ սիրել, և այն էլ ձեզ, պատասխանեց Ջագունյանը:

Ոչ, ես ձեր կնոջն եմ ասում:

Ես նրան սիրում էի իբրև կնոջս և գավակիս մորը:

Իբրև կնոջը և գավակի մորը, դարձյալ մտախոհությամբ արտասանեց Էմման և կարճ ժամանակ լռեց: Եվ մեղադրո՞ւմ եք նրան, որ նա թողեց ձեզ և սիրեց Ջագորսկուն, նորից հարցրեց նա:

Ոչ, պատասխանեց Ջագունյանը:

Էմման աչքերը շոեց:

Հապա՞, հարցրեց նա:

Ես մեղադրում եմ Ջագորսկուն, թեև, իհարկե... կնոջս վրա էլ ընկնում է հանցանքը: Ջագորսկին իմ ընկերս էր՝ ինչ նշանակությամբ որ ուզում եք վերցրեք այդ, և նա չպետք է դավաճաներ ինձ...

Բայց ձեր կինն առավել ևս չպետք է դավաճաներ ձեզ, քանի որ ձեր օրինավոր կինն էր, ընկերից էլ ավելի էր ձեզ համար, զարմանալով ասաց Էմման:

Ոչ, կնոջը դարձյալ ներելի է, որովհետև կինը թույլ արարած է: Շատ անգամ հասարակ տպավորությունը նա սիրո տեղ է ընդունում և այդ պատճառով սխալանքի մեջ է ընկնում. բայց տղամարդին այդ երբեք ներելի չէ, որովհետև նա ավելի հեռատես և փորձված է: Փոխանակ օգուտ քաղելու կնոջ թուլությունից, նրա պարտականությունն է վեհանձնորեն հեռանալ նրանից, հիշեցնելով նրան նրա ամուսնական պարտականությունները:

Եվ Ջագունյանը այդ նյութի մասին երկար խոսելով, կամաց-կամաց իրեն մեջ ձգեց, և ասաց, որ ինքը չկամենալով իր գաղափարին հակառակ գնացած լինել, պարտավոր է թողնել Էմմային և հեռանալ, որ ինքը պարտավոր է հիշեցնել Էմմային ամուսնական պարտականությունները:

Էմման նստած էր բոլորովին անշարժ. նա լսում էր Ջագունյանին առանց ձայն-ծպտուն հանելու: Նրա ամբողջ էությանը մի տեսակ մեռելային հանգստություն էր տիրել. միայն գունատ դեմքի վրա մի տեսակ մեղմ, դառն ժպիտ էր խաղում, որ լավ բան չէր գուշակում, և Ջագունյանն զգում էր այդ, զգում էր և, զարմանալի է, տեսնում էր, որ իր խոսքերը մի տեսակ կեղծ են, սրտից չեն բխում, գուցե և սխալ են և չունեն այն ուժը, որ համոզեն Էմմային, և այդ բանը Ջագունյանին ամոթ էր պատճառում: Նա այլևս չկարողացավ շարունակել, հանկարծ լռեց և երկյուղով սպասում էր, թե Էմման ինչ պետք է պատասխանի իրեն:

Էմման լուռ էր: Օտարոտի մեղմ ժպիտը չէր հեռանում, նրա դեմքից:

Էմմա, մի՞թե ինձ հետ համաձայն չես, իրեն ուժ տալով, կամաց հարցրեց Ջագունյանը և կամաց թեքվեց դեպի նրա դեմքը:

«Ահա, զարկում եմ այս ապառաժին, ուզում եմ ջուր, ջուր, այրող ծարավս կոտրելու համար նա ինձ տալիս է բորբոքված ոսկի», վերջապես մտախոհությամբ հագիվ լսելի ձայնով արտասանեց Էմման Շիլլերի Փիլիպոս թագավորի խոսքերը և գլուխը դառնությամբ շարժեց: Չոր է, չոր է, պարսն

Ջագունյան, ասաց նա, դեմքը կամաց դեպի նա դարձնելով: Գուցե շատ ճշմարիտ, շատ խելոք են ձեր ասածները, բայց... այստեղ, այստեղ (նա ձեռքը դրեց իր կրծքին)... այստեղ մի բան կա, որ համաձայն չէ: Ունի՞ք արդյոք դուք այդ «մի բանը»... աստված գիտե:

Ջագունյանը բոլորովին ստորացած՝ նայեց նրան:

Էմմա, ինչո՞ւ ես ինձ այդպես վիրավորում, մեղմ հանդիմանությամբ ասաց նա:

Օ՛հ, եթե գիտենաք, թե ո՛վ ո՛ւմն է վիրավորում...

Ուզում ես ասել՝ ե՞ս եմ քեզ վիրավորում:

Բավական է, հանկարծ, կարծես շնչասպառ լինելով, արտասանեց Էմման և վեր կացավ տեղից: Օ՛հ, այդպես շո՛ւտ հիասթափվել, սաստիկ հուսահատությամբ բացականչեց նա, և նրա ձայնը դողաց: Նա գնաց նստեց գահավորակի վրա և դեմքը ծածկեց ձեռքերով:

Ջագունյանը կատարելապես մեռելի գույն ստացավ:

Էմմա՛, մի՛ սպանիր ինձ, կանչեց նա խենթի նման վեր թռավ տեղից: Է՛մմա:

Էմման լուռ էր:

Է՛մմա, հուսահատական աղերսանքով կրկնեց Ջագունյանը: Դու ինձ բոլորովին չես խղճում:

Էմմայի ուսերը ցնցվեցին:

Դու ինձ ստորացնում ես, շարունակեց Ջագունյանը, դու ինձ հողի հետ ես հավասարեցնում նրա համար միայն, որ ես խղճիս ձայնը լսելով, չեմ ուզում մոռացած լինել ընկերական պարտականությունս և իմ միակ, իմ անգին երջանկությունս ուզում եմ գոհ բերել դրան:

Միևնույն ժամանակ գոհ բերելով և ուրիշի միակ երջանկությունը, իմ երջանկությունը, ցնցողաբար հեկեկալով հագիվ կարողացավ արտասանել

Էմման:

Ջագունյանը տանջանքով նայեց նրան: Նրա սիրտը պատռվում էր:

Ուրեմն ի՞նչ անեն, ինքդ ասա, հուսահատությամբ կանչեց նա: Տույց տուր ինձ մի ճանապարհ, ուղիղ ճանապարհ այս սարսափելի քառսից դուրս գալու համար:

Ես ոչ մի ճանապարհ չգիտեմ... Ես միայն այն գիտեմ, որ դու ինձ տանջում ես, սոսկալի կերպով տանջում ես...

Եվ Էմման դեմքը ձեռքերով ծածկած՝ խոնարհվեց ծնկների վրա . հեկեկանքից նրա ամբողջ մարմինը վեր ու վեր էր թռչում:

Ջագունյանը զգաց, որ մի բան իր սրտից հանկարծ վեր նետվեց և սկսեց խեղդել կոկորդը: Նա ամուր սեղմեց շրթունքները և մի րոպե ոչինչ չկարողացավ արտասանել:

Էմմա, մի՞թե չես կարող մեր դրության վրա փոքր-ինչ զգաստ հայացքով նայել, ըստ երևույթին, շատ հանգիստ ձայնով վերջապես ասաց նա: Մի՞թե դու չես հավատում, որ մեզ պեսների համար երկնային պատուհաս կա:

Էմման հանկարծ նստեց ուղիղ և արտասովալից աչքերն ու դողդոջուն ձեռքերը վերև տարածեց:

Օ՛, երկինք, տո՛ւր ինձ այդ պատուհասը, եթե ես մեղավոր եմ, բացականչեց նա: Ես ամենայն հպատակությամբ կտանեմ այդ պատուհասը, եթե միայն դրանով մեղքս քաված կլինեմ: Բայց ասոված, դու գիտես, որ ես մեղավոր չեմ:

Ջագունյանն անշարժ կանգնած՝ հոնքերի տակից նախ մռայլ հայացքով նայեց նրա տանջված, արտասովալից աչքերին և, կարծես սաստիկ հոգնած, նստեց աթոռի վրա . նա այլևս ոչ մի խոսք չգտավ ասելու:

Հանկարծ Էմման վեր թռավ տեղից, վազեց դեպի նա և չոքեց նրա առջև:

Արսեն, կանչեց նա անհուն, հուսահատ սիրով գրկելով նրա մեջքը: Եթե դու ինձ ու քեզ իսկապես մեղավոր ես համարում և հավատում ես, որ դրա համար երկինքը մեզ պատուհաս կուղարկե, մի վախենար այդ պատուհասից: Ես ամենայն պատրաստակամությամբ քեզ համար իմ գլուխս կխոնարհեմ այդ պատուհասի առջև, արա նույնը և դու ինձ համար: Մի՞թե այդ պատուհասի փոխարեն ես չեմ կարող քեզ գեթ մի չնչին երջանկություն տալ, որ ամեն բանից թանկ չլինի քեզ համար: Ես կին եմ, Արսեն, մի թույլ, մի փխրուն արարած, որ եթե մի ուժ, մի միջոց ունի ապրելու և երջանիկ լինելու այդ նրա սիրտն է. մի՛ փշրիր այդ սիրտը: Ես քեզանից ոչինչ եմ ուզում, Արսեն, միայն մի՛ հեռանար ինձնից: Աստված է վկա, ես չեմ կարող ապրել, եթե դու հեռանաս, ի՞նչպես կարող եմ, ինքդ ասա, ի՞նչպես կարող եմ, քանի որ սիրտս, հոգիս, ամբողջ էությունս անդառնալի կերպով քեզ եմ նվիրել: Ա՛խ, Արսեն, տեսնո՞ւմ ես՝ ինչպես եմ աղերսում, քեզնից է միայն կախված ինձ երջանիկ անել, մի՛ գրկիր ինձ այդ ողորմությունից: Ինչո՞ւ ես լռում, մի բան ասա, մխիթարիր ինձ, տեսնո՞ւմ ես, ինչպես եմ տանջվում:

Չագունյանը քնքշությամբ գրկեց նրան և վեր կացրեց:

Էմմա, արտասանեց նա միայն:

Այդ մի բառն այնպիսի քնքշությամբ, սիրով, անձնվիրությամբ էր արտասանված, որ Էմման շատ բան զգաց, հասկացավ դրանից և գոհ մնաց: Նա իր սիրուն գլուխը կամաց դրեց նրա կրծքի վրա և արտասավալից աչքերն անհուն երջանկությամբ ձգեց նրա աչքերին:

Կամ երկնային պատուհաս, կամ երջանկություն՞, հագիվ լսելի ձայնով հարցրեց նա:

Կամ երկնային պատուհաս, կամ երջանկություն, կարծես երագի մեջ արտասանեց Չագունյանը և աչքերը փակելով, շրթունքը կամաց սեղմեց նրա սպիտակ ճակատին:

Էմմայի վոնդելուց հետո Աննան ստիպված էր այլևս չգնալ նրանց տուն: Նույն անկեղծ և նույն ջերմ զգացմունքով սիրելով իր վաղեմի ընկերուհուն, նա բոլորովին չէր նեղանում Էմմայի մինչև այդ աստիճան հասցրած կոպիտ վարմունքից, որովհետև այդ բանում մեղավորը ոչ թե նրան էր համարում, այլ իրեն: Ինչո՞ւ: Որովհետև նա շատ անտակտ, շատ անմիտ կերպով էր վարվել Էմմայի հետ. շատ լավ հասկանալով, թե ինչպիսի համարյա ինքնամոռացության հասցրած զգացմունքով սիրում է Էմման Ջագունյանին և կամենալով հեռացնել նրան այդ սխալ ճանապարհից, նա բոլորովին չէր մտածել, թե ինչպես վարվի նրա հետ, որպեսզի հասնի իր նպատակին: Փոխանակ գուրգուրելու նրան, ինչպես երեխայի, փոխանակ սիրով և քաղցրությամբ հասկացնելու նրան գործի դրությունը, որպեսզի այդպիսով հարկավոր թելերը բռնած ունենա իր ձեռքում, նա չկարողանալով զսպել իր տաքարյուն բնավորությունը, ուղղակի հենց առաջին քայլից հարձակվեց նրա վրա համարյա բռնի միջոցներով: Այդ դեռ բավական չէր, նա գործը փչացրեց գլխավորապես այն բանով, որ չափից դուրս կատաղելով Ջագունյանի դեմ, հենց ուղղակի իրեն Էմմայի մոտ նրա հասցեին շատ վատ ածականների սկսեց շռայլել: Այդ արդեն չափից դուրս էր: Էմման ի՛նչ ներեր, չներեր նրան, այդ բանն արդեն ոչ մի կերպ չէր կարող ներել: Նա այնպիսի գաղափար չէր կազմել Ջագունյանի վրա և այնպես չէր սիրում նրան, որպեսզի սառնասրտությամբ կարողանար լսել նրա մասին որևէ, թեկուզ հենց ամենաաննշան վատ խոսք: Աննան այդ հետո հասկացավ, բայց արդեն ուշ էր, էլ ոչ մի կերպ չէր կարելի ձեռք բերել Էմմայի առաջվան սերն ու վստահությունը, մանավանդ որ նա կասկածում էր, թե Աննան նախանձում է իրեն Ջագունյանի վերաբերությամբ և միայն այդ նախանձից դրդված է գործում: Էմման այժմ ուղղակի աստում էր նրան, սակայն աստում էր չհասկանալով նրան: Այդ ավելի դառն էր Աննայի համար, որ մի րոպե անգամ չէր դադարել նրան առաջվա նման սիրելուց: Նա այժմ առավել ևս տանջվում էր այն գիտակցությունից, որ Էմման իր կույր սիրով իրեն անդունդ կգլորի: Ինչպե՞ս նա ցանկանում էր ուղղել իր սխալը... բայց մի՞թե այլևս ոչ մի հույս չկա, մի՞թե իսկապես Էմման անդառնալի կերպով կորած է նրա համար, մի՞թե այլևս չի կարելի նրան մոտենալ... Ի՞նչ անենք թե նա վոնդել է նրան իր տնից, այդ անելիս նա այնպիսի դրության մեջ էր, որ իր արածն ինքն էլ չէր հասկանում, ուրեմն մի՞թե դրանից պետք է հուսահատվել, գուցե նա այժմ գղջում էլ է, որ իր վաղեմի ընկերուհու հետ այդպես է վարվել: Ինչո՞ւ չփորձի, չգնա նրա մոտ: Գուցե այժմ

ամեն ինչ կարելի է ուղղել . . . Ավելի լավ չէ՞, որ փորձի:

Ի ներքուստ մի բան հանգիստ չէր տալիս Աննային: Նա չէր կարողանում հաստատապես և միանգամից վճռել՝ գնա՞ւ Էմմայի մոտ, թե ոչ: Վերջապես վճռեց, որ գնա: Ինչ կլինի, թող լինի: Ամբողջ երկու շաբաթ էր, ինչ նա ոտք չէր դրել Մարկոսյանների տուն: Մի օր, կեսօրից առաջ, նա գնաց:

Հենց ուզում էր քաշել Մարկոսյանների տան դռան զանգակը, երբ հանկարծ դուռը բացվեց, և այնտեղից դուրս եկավ Ջագունյանը:

Աննան բոլորովին չէր սպասում նրան: Նրա լուրջ դեմքը և ցիլինդրը տեսնելուն պես՝ բոլոր մաղձը շարժվեց նրա սրտում շ:

Ա՛, պ. Ջագունյան, երկարացրեց նա մի կասկածավոր հայացք ձգելով նրա վրա և սեղմելով նրա ձեռքը: Դուք դեռ այստեղ եք... դեռ անցյալ շաբաթ, կարծես, ուզում էիք հեռանալ այստեղից:

Ջագունյանը բոլորովին շփոթվեց, ինչպես սպասում էր Աննան. ընդհակառակն՝ նա համարձակ, մինչև անգամ խիստ հայացքով նայեց նրան:

Այո, տիկին, պատասխանեց նա սառնությամբ, պետք է հեռանայի, բայց... մի քանի հանգամանքներ արգելք եղան:

Հա՛, ականա խորհրդավոր եղանակով երկարացրեց Աննան, ավելի խոր նայելով նրա աչքերին: Բայց դարձյալ երկա՞ր եք մնալու այստեղ, հարցրեց նա:

Չգիտեմ... հայտնի չէ, առավել ևս սառնությամբ և այս անգամ առանց նրան նայելու պատասխանեց Ջագունյանը: Նա չսեղմեց Աննայի ձեռքը, միայն ցիլինդրը վերցրեց, գլուխ տվեց նրան և հեռացավ:

Աննան ականա նայեց նրա ետևից:

«Ի՛նչ սիրուն է անիծածը», մտածեց նա և ներս մտավ: Սանդուղքի գլխին տեսավ Էմմային, որը, ինչպես երևում էր, վերևից նայում և լսում էր նրանց: Նա բարձրացավ Էմմայի մոտ այն ժամանակ, երբ Էմման, կարծես նոր ուշքի գալով,

հանկարծ դարձավ և, առանց նրան նայելու և ձայն հանելու, ուզում էր հեռանալ:
Աննան անհամարձակությամբ կտրեց նրա առաջը:

Բարև, Էմմա, ասաց նա, չհամարձակվելով ձեռք տալ նրան:

Բարև, սառնությամբ պատասխանեց Էմման, նայելով հատակին:

Աննան շատ գղջաց, որ եկավ, բայց էլ ոչինչ չէր լինի:

Ներիր, որ ես դարձյալ անհանգստացնում եմ քեզ, չնայելով որ դու ինձ արգելել
ես ձեր տուն գալ, ասաց նա:

Ես եկել եմ... Արամիկի համար... նրան շատ կարոտել եմ: Թո՞ւյլ կտաս, որ
տեսնեմ նրան:

Արամիկն այժմ այստեղ չէ, նրան ուղարկել եմ գրոսանքի, նույն սառնությամբ
պատասխանեց Էմման:

«Ա՛, նրան հեռացնում է տնից, որ արգելք չլինի իր սիրահարական
տեսակցություններին», մտածեց Աննան և շատ վատ հայացքով նայեց նրան:

Կարո՞ղ եմ նրան սպասել, հարցրեց նա:

Ինչպես կամենում ես, ասաց Էմման և առանց շտապելու հեռացավ դեպի իր
սենյակը:

Աննան երկար ժամանակ նայեց նրա ետևից:

Վա՛յ, Էմմա, վա՛յ, Էմմա, այդ ի՛նչ ես անում, սարսափած և սաստիկ
խղճահարված շնչաց նա:

Քառորդ ժամից հետո եկավ Արամիկն աղախնի հետ:

Ո՞րտեղ էիր, սիրելիս, հարցրեց Աննան:

Պարտիզում, պատասխանեց Արամիկը:

Պարտիզուն ի՞նչ էիր շինում:

Խաղում էի:

Ո՞ւմ հետ:

Երեխաների հետ: Այնտեղ շատ երեխաներ են գալիս, համ ինձնից մեծ, համ ինձնից փոքր, իմ չափ էլ կան:

Ամե՞ն օր ես գնում խաղալու:

Այո, մաման ամեն օր ուղարկում է խաղալու:

Հետո՞, այսքան ժամանակ խաղա՞լ կլինի: Շատ ժամանակ է, չէ՞, որ գնացել էիք պարտեզ:

Այո, շատ ժամանակ է:

Հետո ինչո՞ւ այսպես ուշ եք տուն դալիս:

Ի՞նչ անեն, մաման ասում է, որ կեսօրից առաջ տուն չգանք:

«Խեղճ երեխա, խեղճ երեխա», մտածեց Աննան, անհուն խղճահարությամբ նայելով նրա անմեղ աչքերին, որոնք հիշեցնում էին մոր գեղեցիկ աչքերը:

Արամիկ, կգա՞ս, քեզ տանեն մեր տուն, հարցրեց նա:

Եթե մաման կթողնի, ինչո՞ւ չեն գա, պատասխանեց երեխան:

Ես իսկույն մամային կասեմ, ասաց Աննան և գնաց դեպի Էմմայի սենյակը: Նա ներս չմտավ և դռան ճեղքից կանչեց. Է՛մմա:

Ի՞նչ է, լավեց ներսից Էմմայի ձայնը:

Չե՞ս թույլ տա Արամիկին մի-երկու օրով տանեն ինձ մոտ, հարցրեց Աննան:

Խնդրիր Ջաքարին. եթե թույլ կտա, տար:

«Ո՛չ, չեմ տանի», ինքնիրեն ասաց Աննան կատաղած: «Թող այդ երեխան միշտ աչքի առջևը լինի և գոնե դրա անմեղությունը զարթեցնի նրա խիղճը, տանջի, չարչարի նրան»... Նա գնաց Արամիկի մոտ:

Միրելիս, այսօր կաց, ես քեզ ուրիշ անգամ կտանեմ, հա՞, ասաց նա:

Երբ որ կտանեք, ես այն ժամանակ կգամ, պատասխանեց երեխան:

Աննան այլևս երկար չմնաց և գնաց:

«Գնա՛, թշվառական, գնա՛, գլորվիր կորստյան անդունդը, խրվիր ցեխի մեջ դու արժանի ես դրան, երբ ինքդ հեռացնում ես քեզնից քո անկեղծ բարեկամներին: Այն սրիկան քեզ լավ է գտել, այլևս քեզ խղճացող չկա, սաստիկ վիրավորված սրտով ասաց նա և այդ օրից արդեն իսկապես ոտը կտրեց Մարկոսյանների տնից: